

<b>CYNGOR SIR YNYS MÔN</b>	
<b>Adroddiad i:</b>	<b>PWYLLGOR SGRIWTINI CORFFORAETHOL A'R PWYLLGOR GWAITH</b>
<b>Dyddiad:</b>	<b>15 Hydref 2014 / 20.10.14 neu 3/11/14</b>
<b>Pwnc:</b>	<b>Adroddiad Drafft y Pwyllgor Sgriwtini Corfforaethol ar yr adolygiad o Gau'r Parc Sglefrio, Llangefni</b>
<b>Aelod(au) Portffolio:</b>	<b>Y Cyng A Morris Jones</b>
<b>Pennaeth Gwasanaeth:</b>	<b>D Williams Cyfarwyddwr Cynaliadwyedd (Arthur Owen)</b>
<b>Awdur yr Adroddiad:</b> Rhif Ffôn: E-bost:	<b>Cadeirydd y Pwyllgor Sgriwtini Corfforaethol a'r Rheolydd Sgriwtini</b>
<b>Aelodau Lleol:</b>	<b>Y Cyng N Roberts, D Rees ac R G Parry</b>

#### **A – Argymhelliad/Argymhellion a Rheswm/Rhesymau**

##### **1) Ailsefydlu'r parc ar y safle gwreiddiol y tu allan i Blas Arthur, Llangefni.**

**Rheswm(Rhesymau):** Cafodd cyfleuster cyhoeddus ei gau heb ddilyn y protocol cywir fel y nodir yng Nghyfansoddiad CSYM, Paragraffau 5.3.2.3(a) & (c) a heb ofyn am yr awdurdod priodol i wneud penderfyniad i wneud i ffwrdd â chyfleuster cymunedol hirsefydlog, yr oedd defnydd yn cael ei wneud ohono Paragraff 2.13.9.1. Roedd y swyddogion dan y camargraff nad oedd angen ymgynghori gan mai gwasanaeth anstatudol oedd hwn. Wedi cael cyngor cyfreithiol, y gofynnwyd amdano ar ôl y cyfarfod hwn, gallwn gadarnhau fod rhaid ymgynghori ynghylch unrhyw newid sylweddol i wasanaeth a ddarperir ar gyfer defnyddwyr, p'un a yw'r gwasanaeth yn statudol ai peidio.

Awgrymwyd bod y parc sglefrio am gael ei drosglwyddo ac o'r herwydd, gofynnwyd am adroddiad lechyd a Diogelwch. Os oedd hynny'n wir, yna gellwn dybio y byddai arian ar gael ar gyfer y cyfleuster. Cadarnhaodd y Swyddogion fod tir wedi cael ei glirio ym Mharc Cymunedol Lôn Las mewn paratoad fe dybir ar gyfer y trosglwyddiad ond ble mae'r ymgynghoriad ar gyfer yr ail-leoli? Roedd y Cyngor yn cymryd arno'r cyfrifoldeb drwy gau'r cyfleuster ac o'r herwydd dylai gymryd y canlyniadau.

Yn ein cyfarfod, cynigiodd yr Aelod Portffolio ofyn i'r Cyfarwyddwr am gymorth swyddog i gynorthwyo'r rheiny sy'n chwilio am grantiau i sefydlu parc sglefrio yn Llangefni. Ystyriwyd bod hwnnw'n gynnig defnyddiol ond cynamserol oherwydd nad oedd y Pwyllgor eto wedi gwneud ei argymhellion ffurfiol.

**2) Dylai'r Pwyllgor Gwaith gychwyn ymgynghoriad ar unwaith ar Ail-dleoli ynteu Ailsefydlu gan ddarparu costau ar gyfer y naill opsiwn a'r llall.**

**Rheswm:** Roedd llawer o waith ymchwil wedi cael ei wneud i sefydlu'r parc yn y lleoliad penodol hwn, roedd wedi mynd drwy'r broses gynllunio llawn a gallwn dybio fod y caniatâd cynllunio gwreiddiol yn sefyll. Mae'r llecyn caled sydd ar y safle yn parhau i fod yn sylfaen addas iawn ar gyfer cyfleuster newydd. Mae'r rhain yn hanfodol a byddai'n ddrud iawn i'w darparu ar safle newydd.

- 3) Dylai Penaethiaid Gwasanaeth sicrhau bod hyfforddiant priodol yn cael ei roddi i Swyddogion a all gael eu hunain mewn sefyllfa debyg yn y dyfodol, h.y. os bwriedir gwneud newidiadau i'r modd y mae ein dinasyddion yn cael at wasanaethau neu'n eu derbyn. Rhaid i ni ymgynghori gyda chydranddeiliaid ac Aelodau Lleol a chynnal Aseidiadau Effaith ar Gydraddoldeb ac Effaith ar Breifatrwydd.

**Rheswm(Rhesymau):** Gellid bod wedi cau'r Parc Sglefrio i ffwrdd a'i wneud yn ddiogel tra'n ymgynghori gyda'r cyhoedd (gan gynnwys yr Aelod Lleol perthnasol a'r Aelod Portffolio), ystyried yr opsiynau ac yna wneud penderfyniad priodol awdurdodedig cyn tynnu'r offer o'r safle. Nid oedd yr eglurhad mewn perthynas â'r adroddiad lechyd a Diogelwch hyd yn oed yn cyfiawnhau'r broses a ddilynwyd.

- 4) Themâu sy'n esblygu a **gwersi i'w dysgu** – ar ôl holi'r gwahoddedigion mewnol ac allanol a darllen y dystiolaeth ysgrifenedig (gweler Para FF am bapurau cefndir) yn Adolygiad y Pwyllgor:-

- a) Ni ddylid gwneud penderfyniadau ynghylch cyfleusterau lleol sy'n cael effaith ar gymunedau ond ar ôl ymgynghori'n llawn gyda'r Cydranddeiliaid, Aelodau Etholedig Lleol a'r Aelod Portffolio perthnasol a dylid rhoi gwybod iddynt am amgylchiadau a rhesymeg unrhyw gamau gweithredu a dim ond wedyn ar ôl cael yr awdurdod priodol.
- b) Ar adeg sefydlu unrhyw fenter ac/neu gyfleuster o'r fath, mae'n hanfodol fod manylion ynghylch perchenogaeth a phwy sy'n gyfrifol am gynnal a chadw, cyllido a goruchwyllo'r adnodd yn cael eu diffinio'n glir a'u deall gan bob un o'r partïon cysylltiedig o'r cychwyn cyntaf ac yn unol â chytundeb ysgrifenedig.
- c) Pan mae Swyddogion yn paratoi i gylchredeg holiadur/arolwg i gael gwybodaeth leol ynghylch pwnc, dylent fod yn ymwybodol o'r cychwyn cyntaf o bwrpas gwneud hynny. Dylai'r arolygon egluro i'r sawl sy'n ymateb, y rhesymau am ofyn y cwestiynau. Dylid eu hysgrifennu mewn modd diduedd heb ddefnyddio cwestiynau arweiniol a dylid eu hanelu at y farchnad/cydranddeiliaid priodol.

d) Dylai Swyddogion sy'n mynychu Adolygiadau'r Pwyllgor Sgrwtini gasglu ymlaen llaw dystiolaeth sydd, yn eu barn nhw, yn berthnasol er mwyn dangos y drefn o ran gwneud penderfyniadau a sicrhau ei chywirdeb, yn hytrach na dim ond cyflwyno'r papurau y gofynnwyd amdanynt gan y Pwyllgor. Yn ychwanegol at hyn, dylent gadw mewn cof yr argraff y maent yn ei rhoddi drwy beidio â bod yn rhagweithiol.

**B – Pa opsiynau eraill wnaethoch chi eu hystyried a beth oedd eich rhesymau dros eu gwrthod ac/neu ddewis yr opsiwn hwn?**

Mae safle arall wedi cael ei gynnig ond nid yw'n cwrdd â'r meini prawf angenrheidiol ar gyfer cyfleuster o'r fath, e.e. lleoliad a diogelwch ar gyfer y bobl ifanc yn bennaf sy'n defnyddio'r cyfleuster chwaraeon.

**C – Am ba reswm y mae hwn yn benderfyniad i'r Pwyllgor Gwaith?**

Dyrannu cyllid i ailsefydlu'r parc sglefrio.

**CH – A yw'r penderfyniad hwn yn gyson â'r polisi a gymeradwywyd gan y Cyngor llawn?**

Mae hwn yn fater i'r Gwasanaeth gafodd wared ar y cyfleuster ac mae'n unol â pholisi'r Cyngor.

**D – A yw'r penderfyniad hwn o fewn y gyllideb a gymeradwywyd gan y Cyngor?**

Angen cyngor gan y Swyddog Adran 151.

<b>DD – Gyda phwy wnaethoch chi ymgynghori?</b>		<b>Beth oedd eu sylwadau?</b>
<b>1</b>	<b>Prif Weithredwr / Uwch Dim Arweinyddiaeth (UDA)</b> (mandadol)	Cydnabod casgliadau'r Pwyllgor Sgrwtini a'i argymhellion.
<b>2</b>	<b>Cyllid / Adran 151</b> (mandadol)	Dim sylwadau ar yr adroddiad.
<b>3</b>	<b>Cyfreithiol / Swyddog Monitro</b> (mandadol)	Os ydym yn darparu gwasanaeth, p'un a yw'n statudol neu'n anstatudol, rhaid i ni ymgynghori ar unrhyw newidiadau sylwedddol i'r Gwasanaeth hwnnw a fydd yn cael effaith ar y ddarpariaeth o wasanaeth i'r defnyddwyr. Wrth gwrs, rhaid i'r ymgynghori fod yn gymesur â'r newidiadau yr ydym yn eu gwneud ynghyd â chaniatáu amser rhesymol i ymgynghori gyda chydranddeiliaid perthnasol. Hefyd, mae angen i ni fedru

		dangos ein bod wedi rhoi sylw priodol i'r ymatebion hynny. Byddai ffactorau fel brys yn ystyriaeth o ran yr hyn sy'n briodol.
4	<b>Adnoddau Dynol (AD)</b>	d/b
5	<b>Eiddo</b>	Dim sylwadau
6	<b>Technoleg Gwybodaeth Cyfathrebu (TGCh)</b>	d/b
7	<b>Sgriwtini</b>	Cyfarfod Arbennig gyda Chyfranwyr Allanol yn bresennol, cynhaliwyd 26.9.14
8	<b>Aelodau Lleol</b>	Cawsant wahoddiad i'r Cyfarfod Sgriwtini uchod. Ymgynghorodd y Swyddogion gyda'r ddau Aelod Lleol dim ond ar ôl i'r offer gael ei dynnu o'r parc ac wedi i erthygl ymddangos yn y wasg (Mail 9.7.14) gyda defnyddwyr y parc yn cwyno am ei gau. Cadarnhaodd yr Aelod Lleol y cafwyd rhywfaint o ymddygiad gwrthgymdeithasol ar y safle yn y gorffennol ond bod hynny wedi dod i ben.
9	<b>Unrhyw gyrff allanol / arall/eraill</b>	Cyn-glerc Cyngor Tref Llangefni (AM), Cwmni Tref Llangefni (DP/TJ a GJ), Cyngor Tref (JEL), CSYM (BP), un o ddefnyddwyr y Parc Sglefrio (DM) – eisiau adsefydlu'r parc

<b>E – Risgiau ac unrhyw gamau lliniaru (os yn berthnasol)</b>		
1	<b>Economaidd</b>	
2	<b>Gwrthdodi</b>	
3	<b>Trosedd ac Anhrefn</b>	
4	<b>Amgylcheddol</b>	
5	<b>Cydraddoldebau</b>	
6	<b>Cytundebau Canlyniad</b>	
7	<b>Arall</b>	

<b>F - Atodiadau:</b>
Cofnodion y Pwyllgor Sgriwtini Corfforaethol: 26 Medi 2014

<b>FF - Papurau Cefndir (cysylltwch os gwelwch yn dda gydag awdur yr Adroddiad am unrhyw wybodaeth bellach):</b>
Wedi di gyflwyno i'r Rheolydd Sgriwtini, CSYM, Ystafell 1044, Pencadlys y Cyngor Sir, Llangefni:

- Canlyniadau Arolwg Parc Sglefrio Canolfan Hamdden Plas Arthur
- Rhestr Wirio Cynnal a Chadw'r Ganolfan Hamdden
- Adroddiad ROSPA
- Adroddiad Arolygiad Diogelwch Annibynnol
- Nodyn Briffio'r Pennaeth Gwasanaeth

# PWYLLGOR SGRIWTINI CORFFORAETHOL

## Cofnodion y cyfarfod arbennig a gynhaliwyd ar 26 Medi 2014

- PRESENNOL:** Y Cynghorydd R.Meirion Jones (Cadeirydd)  
Y Cynghorydd G.O.Jones (Is-Gadeirydd)
- Y Cynghorwyr Llinos Medi Huws, Victor Hughes, Raymond Jones,  
R.Llewelyn Jones, Peter Rogers
- WRTH LAW:** Y Cynghorydd Aled Morris Jones (Aelod Portffolio Gwasanaethau Hamdden)  
Cyfarwyddwr Datblygiad Cynaliadwy  
Prif Swyddog Hamdden (DB)  
Rheolwr Canolfan Hamdden Plas Arthur (JS)  
Rheolydd Sgriwtini (BS)  
Swyddog Pwyllgor (ATH)
- YMDDIHEURIADAU:** Y Cynghorydd Jim Evans
- YN CYFRANNU:** Y Cynghorwyr Dylan Rees, R.G.Parry, OBE (Aelodau Lleol), Mr Arnold Milburn (Cyn-Glerc Cyngor Tref Llangefni), Cynrychiolwyr Cyngor Tref Llangefni, Mr Dewi Morgan (un o Ddefnyddwyr y Gwasanaeth) Y Mri. Dic Pritchard, Gwyn Jones Trefor Edwards (Cwmni Tref Llangefni), Mr J.E.Lewis (Cyngor Tref Llangefni)
- 

### 1 DATGANIAD O DDIDDORDEB

Ni chafwyd unrhyw ddatganiadau o ddiddordeb.

### 2 CAU PARC SGLEFRIO LLANGEFNI

Rhoes y Cadeirydd groeso i bawb a oedd yn bresennol i'r cyfarfod arbennig hwn o'r Pwyllgor Sgriwtini Corfforaethol a drefnwyd i ystyried cau Parc Sglefrio Llangefni ac unrhyw wersi i'w dysgu o'r broses honno a hynny'n unol â'r cais a wnaed gan y Cynghorydd Victor Hughes ac a gymeradwywyd gan y Pwyllgor yn ei gyfarfod ar 1 Medi 2014.

Rhodddwyd i'r Pwyllgor wybodaeth gefndirol ynglŷn ag amgylchiadau gwneud y penderfyniad i gau'r Parc Sglefrio yn Llangefni.

Gofynnodd y Cadeirydd i'r Cynghorydd Victor Hughes egluro'r rhesymau dros ofyn i'r Pwyllgor Sgriwtini Corfforaethol ymchwilio i'r mater.

Nododd y Cynghorydd Victor Hughes y pwyntiau canlynol –

- Fel un o gyfarwyddwyr gweithredol Cwmni Tref Llangefni a fu'n allweddol yn y broses o sefydlu Parc Sglefrio Llangefni, roedd yn siomedig bod y parc wedi cau a'r modd y gwnaed hynny ac effaith andwyol y penderfyniad ar y gymuned leol a defnyddwyr y parc.
- Disgrifiodd yr ymdrechion a wnaed yn 2002 i ddod â'r Parc Sglefrio i Llangefni fel adnodd y gallai pobl ifanc y dref ei ddefnyddio a'r anawsterau a gafwyd i ddod o hyd i leoliad derbyniol ac addas.
- Rhoes amlinellid o fewnbwn y Cyngor Sir ar y pryd o ran cynorthwyo i ddiogelu cyllid grant a chaniatâd cynllunio (gohebiaeth ddyddiedig 10 Ebrill 2003 gan Bennaeth y Gwasanaethau Hamdden ar y pryd).
- Wedi hynny, sefydlwyd y Parc Sglefrio a bu'n cael ei ddefnyddio yn gyson ers hynny.
- Ar 11 Gorffennaf 2014 sylwodd fod offer y Parc Sglefrio yn cael ei gludo ymaith ar lori. Wedi ymholi, canfuwyd nad oedd yr Aelodau Lleol yn ymwybodol o'r datblygiad hwn ac nid oedd y Prif Weithredwr ychwaith yn ymwybodol pan ofynnwyd iddo'r diwrnod canlynol.

- Rhoddwyd y gorau ar unwaith i ddefnyddio adnodd gwerth £70k ar sail dau adroddiad iechyd a diogelwch - y naill gan RoSPA a'r llall yn adroddiad archwilio ar wahân - a hynny heb ymchwilio ymhellach i'r posibilrwydd o drwsio'r offer.
- Mae'r ail adroddiad yn argymhell y dylid trin y rhannau o'r offer a oedd wedi rhydu gyda golwg ar ymestyn oes a sefydlogrwydd yr offer.
- Disgrifiwyd sefyllfa debyg mewn newyddlen gymunedol ar gyfer cymuned Blaenau Ffestiniog lle cafodd penderfyniad i gau Parc Sglefrio lleol yr oedd ei gyflwr wedi ei dirywio ei wyrdroi gan ymdrech gydweithredol yn y gymuned i godi £15k ar gyfer gwaith trwsio. Nid yw swm oddeutu £15k yn swm mawr i wario ar drwsio'r offer o gofio'r buddsoddiad gwreiddiol o £70k ar Barc Sglefrio Llangefni. Chafodd cymuned Llangefni mo'r cyfle i wneud unrhyw waith trwsio.
- Ei fod yn teimlo bod yr holiadur ynghylch Parc Sglefrio Plas Arthur a luniwyd i gynorthwyo gyda'r penderfyniad ynghylch dyfodol y parc, wedi ei eirio yn negyddol ac mewn modd a oedd yn cefnogi cau/ail-leoli'r parc.

Clywodd y Pwyllgor gan Mr Dave Barker, Y Prif Swyddog Hamdden, Mr James Stuart, Rheolwr Canolfan Hamdden Plas Arthur a Mr Arnold Milburn, cyn Glerc Cyngor Tref Llangefni a wahoddwyd i'r cyfarfod i roddi i'r Pwyllgor wybodaeth ynghylch y ffactorau a'r amgylchiadau a arweiniodd at gau'r Parc Sglefrio. Cafodd Aelodau'r Pwyllgor y cyfle i ofyn cwestiynau i'r sawl a wahoddwyd er mwyn cael eglurhad ar y sefyllfa.

Llywiodd y Cadeirydd y cyfarfod yn ôl y drefn a nodwyd yn rhestr ddogfennau'r Pwyllgor:

- Canlyniadau'r Arolwg ar y Parc Sglefrio
- Rhestr Wirio Archwiliadau'r Ganolfan Hamdden
- Adroddiad RoSPA
- Adroddiad ar Archwiliad Diogelwch Annibynnol
- Nodyn Briffio gan y Pennaeth Gwasanaeth

Cododd y pwyntiau canlynol o'r cwestiynau a ofynnwyd a'r ymatebion iddynt:

- Mae rhestr wirio Swyddog Dyletswydd Plas Arthur yn rhan o drefn weithredu'r Ganolfan Hamdden. Ymestynnwyd yr arfer i'r Parc Sglefrio oherwydd y sbwriel a adawyd ar y parc, problem a waethygodd ar ôl 2010. Cafwyd hefyd achosion o ymddygiad gwrthgymdeithasol a gyfeiriwyd at yr Heddlu ar dri achlysur. Gwyddys fod cwynion wedi cael eu gwneud ynghylch ymddygiad gwrthgymdeithasol mor bell yn ôl â 2005.
- Rhoddwyd gwybod i Glerc Cyngor Tref Llangefni am unrhyw ddiffygion o bwys a gwnaeth y Cyngor hwnnw'r mân waith trwsio.
- Cafodd yr holiadur defnyddwyr a baratowyd gan y Cyngor Tref ei lunio er mwyn cael tystiolaeth o'r defnydd a oedd yn cael ei wneud o'r Parc Sglefrio oherwydd bod lefel y defnydd ar y pryd yn isel ac er mwyn codi ymwybyddiaeth o'r problemau cyffuriau, ymddygiad gwrthgymdeithasol a sbwriel. Roedd yn rhan o'r adolygiad o'r parc yn ei gyfanrwydd gan gynnwys ei weithrediad a'r problemau y gall fod yn eu hachosi.
- Mae'r safle lle bwriedir ail-leoli'r Parc Sglefrio ym Mharc Cymuned Lôn Las eisoes â chyfleusterau arno. Mae'n safle mwy a gellid ei alw yn hyb cymunedol.
- Cafodd yr adroddiad gan yr arolygydd annibynnol ar gyflwr y Parc Sglefrio dyddiedig Mai 2014 ei gomisiynu'n anffurfiol gan Glerc Cyngor Tref Llangefni ar y pryd er mwyn dilysu ei asesiad personol ef ei hun o gyflwr dirywiedig offer rhan o'r Parc. Ni chafodd yr adroddiad ei drafod yn ffurfiol gan y Cyngor Tref.
- Anfonwyd yr adroddiad at yr Adran Hamdden. Oherwydd trafodaethau rhwng y Gwasanaeth Hamdden a'r Cyngor Tref ynghylch y posibilrwydd o drosglwyddo'r Parc Sglefrio fel ased, roedd yn rhesymol cael asesiad annibynnol swyddogol o'r offer cyn y trosglwyddiad, ac o'r herwydd, comisiynwyd RoSPA, fel corff a gydnabyddir yn genedlaethol, i gynnal yr asesiad hwnnw. Roedd adroddiad RoSPA dyddiedig Mehefin 2014 yn ategu nifer o'r casgliadau y daethpwyd iddynt gan yr arolygydd annibynnol yn ei adroddiad answyddogol.
- Ar sail sgôr yr asesiad risg yn adroddiad RoSPA a chyngor cyfreithiol a gafwyd ar wahân, codwyd arwydd i hysbysu'r cyhoedd y byddai'r offer yn cael ei dynnu o'r Parc am resymau diogelwch. Gwnaed y penderfyniad gan y Prif Swyddog Hamdden, Rheolwr Canolfan Hamdden Plas Arthur a chyn Glerc y Cyngor Tref a hynny yn wyneb yr adroddiad gan RoSPA.

- Dywedwyd oherwydd bod y Gwasanaeth Hamdden yn un anstatudol nid oedd rhaid ymgynghori. Fodd bynnag, ni chafodd yr Aelodau Lleol Etholedig eu cynnwys yn y broses trwy amryfusedd ac ymddiheurodd y Prif Swyddog Hamdden am hynny.
- Gellid dadlau na fyddai'r penderfyniad i dynnu'r cyfarpar oddi yno wedi newid oherwydd ei fod yn seiliedig ar gasgliadau corff annibynnol uchel ei barch ond byddid wedi medru gweithredu'r penderfyniad mewn ffordd wahanol.
- Tynnwyd y cyfan o'r cyfarpar oddi yno oherwydd y byddai'r darnau bychan a fyddai ar ôl wedi amharu ar lif y parc.
- Roedd y Cyngor Tref wedi gwneud mân-waith trwsio ac roedd yn parhau i wneud i hynny. Seiliwyd y penderfyniad i dynnu'r cyfarpar oddi yno oherwydd y farn nad oedd modd trwsio'r strwythur ac nid oherwydd ymddygiad gwrthgymdeithasol.
- Mae'r Cyngor tref yn gyfrifol am nifer o lecynnau chwarae sy'n cael eu harchwilio bob blwyddyn gan RoSPA. Archwiliwyd Parc Sglefrio Llangefni fel rhan o'r broses honno yng nghyd-destun y bwriad i drosglwyddo'r ased, a chyhoeddwyd yr adroddiad dyddiedig Mehefin 2014 wedyn.
- Nid oes penderfyniad wedi ei wneud mewn perthynas ag unrhyw ddefnydd arall y gellir ei wneud o safle'r Parc Sglefrio.
- Mae yna Gronfa Gymunedol o'r enw Clwb Cadw Mi Gei a sefydlwyd gan y gymuned ar ôl i'r Bartneriaeth Cymunedau'n Gyntaf wneud ei ddyraniad grant ar gyfer sefydlu'r parc, ac mae'r gronfa honno ar hyn o bryd yn cynnwys £2,000.

Clywodd y Pwyllgor hefyd gan Aelod Lleol, y Cynghorydd Dylan Rees ac Aelodau o Gyngor Tref Llangefni a oedd wedi codi materion mewn perthynas â diffyg rhybudd bod y parc am gau ac ynghylch cyflwr y parc a oedd, yn eu barn nhw, yn lân ac yn daclus; ynghylch cyllid ac ynghylch cyfrifoldebau trosolwg.

Dywedodd Mr Dewi Morgan, fel un a oedd yn defnyddio'r Parc Sglefrio ac a fu'n rhan o'r gwaith o'i sefydlu ac y bu ei blant yn ei ddefnyddio, fod llawer o blant a phobl ifanc yn defnyddio'r parc a'i fod yn arbennig o brysur ar y Suliau. Mae ei leoliad cyfredol y tu allan i Ganolfan Hamdden Plas Arthur yn un addas oherwydd mai gweithgareddau hamdden sy'n digwydd yn y Parc Sglefrio ac mae mewn lleoliad diogel sy'n agos i'r ganolfan hamdden. Dywedodd Mr Morgan fod y sylfeini'n parhau i fod yno ac y byddai'n dymuno gweld y Parc yn cael ei ailsefydlu ar y safle gwreiddiol cyn tynnu'r wyneb a cholli'r arian.

Ymateb y Pwyllgor i rai o'r pwyntiau uchod oedd –

- Roedd gwendid sylfaenol yn yr arolwg ac roedd wedi ei dargedu at ddefnyddwyr y Ganolfan Hamdden ac nid defnyddwyr y Parc Sglefrio
- Ni ddarparwyd unrhyw dystiolaeth ysgrifenedig
  - i. I ddangos pa mor aml yr oedd y Parc Sglefrio'n cael ei archwilio
  - ii. Unrhyw werthusiad o waith cynnal yr oedd angen ei wneud, a
  - iii. Gweithdrefn i adrodd yn ôl ar hynny i sicrhau yr awdurdoddir unrhyw gamau gweithredu
  - iv. Mewn perthynas â'r ymddygiad gwrthgymdeithasol y cyfeiriwyd ato neu gwynion gan gwsmeriaid
- Dangoswyd bod y dystiolaeth lafar ynghylch ymddygiad gwrthgymdeithasol yn amherthnasol unwaith yr oedd cronoleg wedi ei sefydlu trwy ofyn cwestiynau.
- Roedd yn ymddangos bod mwy o bwys wedi ei roi ar yr adroddiad gan RoSPA na'r adroddiad ar yr Archwiliad Diogelwch Annibynnol - yn hytrach na bod y ddau adroddiad wedi cael yr un flaenoriaeth. Roedd yr adroddiad diwethaf yn rhoi opsiynau eraill y byddai'r gymuned wedi eu ffafrio.
- Sefydlwyd bod y Swyddogion, wrth ystyried y mater, wedi ceisio a chael cyngor cyfreithiol ar lafar gan y Cyngor Sir.
- Sefydlwyd mai dim ond sion oedd y sôn am faes parcio ar safle'r Parc Sglefrio.
- Roedd gan yr Aelodau gydymdeimlad gyda sefyllfa'r Swyddogion ac yn deall y bu angen gwneud penderfyniad ar fyrder i osgoi risg uwch o anaf posib ac i osgoi cael beirniadaeth am weithredu'n rhy araf.



Nododd y Pwyllgor y themâu a oedd yn codi a'r gwersi y gellid eu dysgu o'r wybodaeth yr oeddent wedi ei chael am gau'r Parc Sglefrio a'r ffordd y cafodd ei wneud. Gofynnodd y Cadeirydd i'r Pwyllgor sut oedd yn dymuno bwrw ymlaen i lunio argymhellion.

Cyfeiriodd y Prif Swyddog Hamdden at nifer o enghreifftiau lleol o Barciau Sglefrio e.e. yng Nghaernarfon, Bangor, Llanfairfechan, Penmaenmawr, Parc Eirias ac ati ac y gallai'r rheini sy'n gwneud cais am grant i sefydlu Parc yn Llangefni ymgynghori â nhw a dysgu o'r safleoedd hyn.

#### **CAMAU GWEITHREDU Y GOFYNNWYD AMDANYNT GAN Y PWYLLGOR**

- **Bod y Rheolydd Sgriwtini, mewn ymgynghoriad gyda'r Cadeirydd, yn llunio adroddiad canlyniad sgriwtini ar adolygiad y Pwyllgor o'r modd y cafodd Parc Sglefrio Llangefni ei gau, gan gynnwys casgliadau ac argymhellion, a chyflwyno drafft i'r Pwyllgor yn ei gyfarfod ar 15 Hydref i'w gymeradwyo cyn cyflwyno adroddiad ffurfiol i'r Pwyllgor Gwaith.**
- **Bod yr Aelod Portffolio ar gyfer Gwasanaethau Hamdden yn ymgynghori gyda'r Cyfarwyddwr Cynaliadwyedd ynghylch ymarferoldeb yr Adran yn arwain ar gymorth gyda gwaith ymchwil ar gyfer cymuned Llangefni i geisio dod o hyd i gyllid grant a safleoedd posib ar gyfer Parc Sglefrio yn Llangefni.**

**Y Cynghorydd R.Meirion Jones  
Cadeirydd**